

司  
夫  
醫  
酒  
如  
子  
設  
書



本草經疏卷九

艸部中品之下

總七十八種今疏其要者三十六種又移入木部

一種果部一種菜部四種

艾葉

惡實

水萍

王瓜

地榆

大小薊

海藻

澤蘭

地筍

昆布

防己

天麻

阿魏

高良薑

百部根

藜香子

欵冬花

紅藍花

牡丹

京三稜

薑黃

青黛

鬱金

蘆薈

延胡索

肉豆蔻

補骨脂

縮砂蜜

蓬莪茂



白前 白藥子 莎艸根 胡黃連

鱧腸 使君子 白豆蔻 剪艸

藿香 木部移入 豆蔻 果部移入 假蘇蘇 蘇黃

香薷 薄荷 已上菜部移入 香干 燈台芥

艾葉味苦微溫無毒主灸百病可作煎止下痢吐血下

部蜜瘡婦人漏血利陰氣生肌肉辟風寒使人有子作

煎勿令見風 弘景搗汁止傷血殺虵蟲蘇恭止衄血下血膿血痢主崩血金瘡安胎苦酒作煎治

癰大明治婦人帶下霍亂轉筋

疏艾葉稟天地之陽氣以生故味苦微溫熟則大熱

可升可降其氣芳烈純陽之艸也故無毒入足太陰

厥陰少陰三經燒則熱氣內注通筋入骨故灸百病

性能通竅辟惡殺鬼精故止鬼擊吐血芳烈之氣必燥故主下部匿瘡其治婦人漏血利陰氣生肌肉者皆以之導引涼血補血藥爲用者也使人有子蓋指氣血兩虛之人風寒乘虛入子宮不孕者設也辟風寒其性辛溫也搗汁服止傷血者生寒而兼辛散也殺虬蟲者辛而苦也主衄血者傷寒邪熱鬱而不汗則發衄也風邪入大腸則下血溼熱傷脾胃則下痢膿血煮則上升故亦止崩漏也理金瘡血熱則行也胎爲風寒之氣所犯則不安風寒散則胎自安也苦酒作煎治癰甚良者殺蟲之功也治婦人帶下溫中除溼而升也止霍亂轉筋者因寒而得也爲治白帶

之要藥調經之妙品故婦人方多須之

主治參互

艾葉能灸百病陳久者良 入紅鉛蒸臍補陽虛溫

脾胃 治婦人月事不調血少無熱證者同香附醋

浸入四物湯加阿膠枳殼神效 金匱要略婦人有

漏下者有半產後下血不絕者有妊娠下血者竝以

膠艾湯主之阿膠二兩艾葉三兩芍藥甘草各二兩

當歸地黃各三兩芍藥四兩水五升清酒五升煮取

三升內膠令消盡每溫酒一升日三服 妊娠產後

血虛人作痢下血用膠艾湯斬艾阿膠白芍藥人參

橘皮甘草胎前加黃芩產後入當歸 燒烟入管中

熏狐惑蟲蜜良 非時不正之氣傷人發爲頭痛壯  
熱因於寒者用乾艾葉三升水一斗煮取一升頓服  
取汗出肘後方 婦人良方治妊娠風寒卒中不省  
人事狀如中風用熟艾三兩米醋和炒極熱以絹包  
熨臍下良久卽解 虻蟲咬或心痛如刺口吐清水  
白熟艾一升水三升煮取一升服吐蟲出或取生艾  
搗汁五更先食香脯一片乃飲一升當下蟲出 鷲  
掌風用蘄艾五兩水四五碗煮五六滾入大口瓶覆  
以麻布二層熏掌心如冷頓熱再熏如神 發背初  
起急灸瘡頭不痛灸至痛痛灸至不痛奪命神方也  
縱潰毒氣外洩不致內攻矣若未潰瘡頭用溼紙貼

上看先乾處是也即於此灸 臙瘡年久口冷不合

者用艾烟熏之

簡誤

艾性純陽善辟風寒溼氣及非時邪氣然性氣芳烈而燥熱凡婦人胎動不安由於熱而不由於寒妊娠下痢膿血由於暑溼腸胃熱甚而非單溼為病崩中由於血虛內熱經事先期由於血熱吐血不由於鬼擊中惡霍亂轉筋不由於寒邪而由於脾胃虛弱停滯或傷暑所致不孕由於血虛而不由於風寒入子宮法竝忌之

惡實味辛平主明目補中除風傷



〔疏〕惡實至秋而成得天地清涼之氣本經言辛平藏器兼苦升多於降陽也入手太陰足陽明經爲散風除熱解毒之要藥辛能散結苦能洩熱熱結散則臟氣清明故明日而補中風之所傷衛氣必壅壅則發熱辛涼解散則表氣和風無所留矣故除風傷藏器主風毒腫諸癩元素主潤肺散結氣利咽膈去皮膚風通十二經者悉此意耳故用以治癰癤痘瘡尤獲奇驗

主治參互

同赤檉木爲癰家要藥 同浮萍等分爲末治風熱癰癤薄荷湯下每服二錢日進二服 同紫艸犀角



生地黃治天行痘瘡血熱乾枯不得出有神 痘癰

要訣治咽喉痘瘡牛旁子二錢桔梗一錢五分粉艸

節七分水煎服 和劑局方治痘瘡出不快時壯熱

狂躁咽膈壅塞大便秘澀小兒咽腫不利牛旁子炒

一錢二分荆芥穗二分甘艸四分水煎溫服已出亦

可服名必勝散若大便利者勿用 延年方治風齩

牙疼單用一味煎湯含漱吐去 袖珍方治便癰腫

痛用牛旁子二錢炒研入蜜一匙朴消一匙空心溫

酒服 劉禹錫傳信方療暴中風用緊細牛旁子根

取時避風以竹刀或荊刀刮去土用生布拭了搗絞

取汁一大升和蜜四大合溫分二服得汗出便瘥

薛簡誤山間不食氣故因藥深恐東風此野青  
惡實性冷而滑利痘瘡家惟宜於血熱便閉之證若  
氣虛色白大便自利或泄瀉者慎勿服之痧癰不忌  
泄瀉故用之無妨癰疽已潰非便閉不宜服

水萍味辛酸寒無毒主暴熱身癢下水氣勝酒長鬚髮  
主消渴下氣以沐浴生毛髮久服輕身一名水花

疏水萍專得水氣之清陰故味辛氣寒別錄兼酸無  
毒蓋其體輕浮其性清燥能祛溼熱之藥也熱氣鬱  
於皮膚則作癢味辛而氣清寒故能散皮膚之溼熱  
也寒能除熱燥能除溼故下水氣酒性溼熱而萍之  
質不沈於水其氣味辛寒輕清而散故能勝酒血熱

則鬚髮焦枯而易墮涼血則榮氣清而鬚髮自長矣  
別錄主消渴者以溼熱之邪去則津液自生而渴自  
止也其曰下氣以沐浴生毛髮者亦以寒能除熱涼  
血之驗也熱邪不干榮氣清旺則能獲輕身矣

主治參互

蘇頌曰治惡疾癘瘡徧身者濃煮汁浴半日多效

聖惠方少年面皯按浮萍會之亦可飲汁少許干

金翼方治小便不利膀胱水氣流滯浮萍日乾爲末

服方寸匕日二服良也子母秘錄風熱丹毒浮萍搗

汁傅之令徧去風丹採浮萍詩曰天生靈艸無根

幹不在山間不在岸始因飛絮逐東風汎梗青青飄

水面神仙一味去沈疴采時須在七月半選甚癱風  
與大風些小微風都不算豆淋酒化服三丸鐵撲頭  
上也出汗其法以紫背浮萍曬乾爲細末煉蜜丸彈  
子大每服一九以豆淋酒化下治癱瘓三十六種風  
有驗

簡誤

表氣虛而自汗者勿用

王瓜味苦寒無毒主消渴內疸瘀血月閉寒熱酸疼益  
氣愈聾療諸邪氣熱結鼠癭散癰腫留血婦人帶下不  
通下乳汁止小便數不禁逐四肢骨節中水療馬骨刺  
人瘡 一名土瓜

〔疏〕王瓜稟土中清肅陰寒之氣故味苦氣寒而無毒其能除溼熱熱毒大約與栝樓性同故其主治內疽消渴邪氣熱結鼠瘦癰腫等證皆與栝樓相似而此則入血分諸病爲多耳簡誤主治與栝樓亦略相當不復贅

地榆味苦甘酸微寒無毒主婦人乳痃痛七傷帶下五漏止痛除惡肉止汗療金瘡止膿血諸瘻惡瘡熱瘡消酒除消渴補絕傷產後內塞可作金瘡膏得髮良

惡麥

門冬

〔疏〕地榆稟地中陰氣而兼得乎天之微陽故味苦甘酸氣則微寒而無毒氣薄厚味沈而降陰也入足厥



陰少陰手足陽明經婦人乳痠痛者厥陰肝經有熱  
以致血分熱壅所致也七情傷於帶脈故帶下也五  
漏者陽明大腸溼熱傷血病也血熱則腫而作痛惡  
肉者亦血熱極則瘀故腫而成惡肉也傷則出血血  
出必發熱而作痛金瘡是也膿血不止皆血熱所致  
諸癩惡瘡莫不由血熱所生苦寒能涼血洩熱熱散  
則血活腫消故竝主如上諸疾也性行而帶補味兼  
甘酸故補絕傷及產後內塞也消酒除渴明目止純  
血痢疝痢極效治腸風者皆善祛溼熱之功也沈寒  
入下焦故多主下部溼熱諸病

主治參互



地榆得金銀花等分佐以芍藥甘艸枳殼黃連烏梅  
治血痢如熱在心經下利純鮮血則加生犀角汁十  
五匙神驗 綿地榆四兩爲君加金銀花兩許鮫鯉  
甲三片土炒研細水酒煎濃空心溫熱服治橫痃魚  
口有神雖甚四服無不消者若已成膿更加鹽水炒  
黃耆五錢白芷二錢主速潰易合去鮫鯉甲并加牛  
膝木瓜殭蠶黃蘗治下疳陰蝕極效 聖惠方治婦  
人漏下赤白不止令人黃瘦地榆三兩米醋一斤煮  
十餘沸去滓食前稍熱服一合 崔元亮海上方治  
赤痢骨立者地榆一斤水三升煎一升半去滓再煎  
如稠餈絞濾空腹時服三合日再服 活法機要治

久病腸風痛癢不止地榆五錢蒼朮一兩水二鍾煎  
一鍾空心服一日一服 別後方治下血不止二十  
年者地榆鼠尾艸各二兩水二升煮一升頓服若不  
斷以水漬屋塵飲一小杯投之 宣明方治結陰下  
血腹痛不已地榆四兩炙甘艸三兩每服五錢水一  
盞入縮砂七枚煎半盞分二服 肘後方治小兒疳  
痢地榆煮汁熬如飴糖與服便已 千金方治大指  
腫痛地榆煮汁漬之半日愈

簡誤

地榆性寒而下行凡脾胃虛寒作泄白痢久而胃弱  
胎產虛寒泄瀉血崩脾虛作泄法竝禁服

大小薊根味甘溫主養精保血大薊主女子赤白沃安胎止吐血鼻衄令人肥健

疏大薊根稟土之冲氣兼得天之陽氣故味甘氣溫而無毒日華子涼當是微寒陶云有毒誤也女子赤白沃血熱所致也胎因熱則不安血熱妄行溢出上竅則吐衄大薊根最能涼血血熱解則諸證自愈矣其性涼而能行行而帶補補血涼血則榮氣和榮氣和故令肥健也

主治參互

大薊葉得地榆茜艸牛膝金銀花治腸癰腹癰少腹癰生搗絞汁入前四味濃汁和童便飲良得炒蒲

黃櫻皮灰調汁半升治崩中下血立瘥 又治瘀血  
作暈跌撲損傷作痛俱生取汁入酒并童便服 又  
治惡瘡疥癬同鹽搗罾之 藥性論云大薊亦可單  
用味苦平止崩中下血生取根搗絞汁服半升許立  
瘥 日華子云大薊葉涼治腸癰腹藏瘀血血暈撲  
損可生研酒并小便任服惡瘡疥癬鹽研罾傳又名  
刺薊山牛旁

小薊根苗氣味甘溫微寒無毒其所稟與大薊皆同  
得土中冲陽之氣而兼得乎春氣者也故主養精保  
血精屬陰氣血之所生也甘溫益血而除大熱故能  
養精而保血也 陳藏器云破宿血生新血暴下血

血崩出血嘔血等絞取汁作煎和沙糖合金瘡及蜘蛛蛇蝎毒服之亦佳 日華子云小薊根涼無毒治熱毒風并胸膈煩悶開胃下食退熱補虛損苗去煩熱生研汁服小薊力微只可退熱不似大薊能補養下氣 食療云小薊根主養氣取生根葉搗取自然汁服一盞亦佳又取葉煮食之除風熱根主崩中又女子月候傷過搗汁半升服之金瘡血不止按葉封之夏月熱煩悶不止搗葉取汁半升服立瘥 聖惠方治心熱吐血口乾用刺薊葉及搗絞取汁每服一小盞頓服 又方乳石發動壅熱心悶吐血以生刺薊搗取汁每服三合入蜜少許攪勻服之 外臺秘



要治鼻塞不通小薊一把水二升煮取一升去滓分  
服 梅師方治卒吐血及瀉鮮血取小薊葉搗汁溫  
服 簡要濟眾治九竅出血以刺薊一握絞取汁以  
酒半盞調和頓服如無鮮汁只搗乾者爲末冷水調  
三錢 又方治小兒浸淫瘡痛不可忍發寒熱刺薊  
末新水調傅瘡上乾卽易之

簡誤

大小薊性下行以其能下氣故主崩衄多效惟不利  
於胃弱泄瀉及血虛極脾胃弱不思飲食之證

海藻味苦鹹寒無毒主癭瘤氣頸下核破散結氣癰腫  
癥瘕堅氣腹中上下鳴下十二水腫療皮間積聚暴癩



本州總誌卷九  
十一  
瘤氣熱結利小便

〔疏〕海藻全稟海中陰氣以生故味苦鹹寒而無毒氣味俱厚純陰沈也苦能洩結寒能除血熱鹹能軟堅潤下故本經主癭瘤氣頸下核破散結氣癰腫癥瘕堅氣及腹中上下鳴下十二水腫療皮間積聚暴癩瘤氣結熱利小便潔古專消癭瘤馬刀瘰癧諸瘡堅而不潰者經云鹹能軟堅榮氣不從外爲浮腫道各引經治之腫無不消反甘艸一云有小毒

主治參互

危氏得效方治蛇盤瘰癧頭項交接者海藻菜以蕎麥麩炒過白僵蠶等分爲末以白梅泡湯和丸梧子

大每服六十丸米飲下必泄出毒氣宜加連翹 范  
汪方海藻酒治癭氣及項下瘰癧用海藻一斤絹袋  
盛之以清酒二斤浸之春夏二日秋冬三日每服兩  
合日三酒盡再作其萍暴乾爲末每服方寸匕日三  
服不過兩劑卽瘥 雷公云凡使須用生烏豆并紫  
背天葵同蒸一伏時暴乾用宜以淡白酒先洗淨爲  
佳

簡誤

脾家有溼者勿服

澤蘭味苦甘微溫無毒主乳婦內衄中風餘疾大腹水  
腫身面四肢浮腫骨節中水金瘡癰腫瘡膿產後金瘡

內塞

防已爲之使  
根名地笱

〔疏〕澤蘭感土澤之氣故味苦甘而入血兼得乎春氣故微溫而無毒桐君兼酸故入足厥陰太陰經苦能洩熱甘能和血酸能入肝溫通榮血故又主癰腫瘡膿及婦人吹乳乳結止衄血并中風餘疾佐以益脾土之藥而用防已爲之使則主大腹水腫身面四肢浮腫骨節中水氣日華子云澤蘭通九竅利關脈養血氣破宿血消癥瘕產前產後百病通小腸長肉生肌消撲損瘀血治鼻洪吐血頭風目痛婦人勞瘦丈夫面黃又藥性論云澤蘭使味苦辛主產後腹痛頻產血氣衰冷成勞瘦羸又治通身面目大腫主婦人

血瀝腰痛總其洩熱和血行而帶補之能也

主治參互

澤蘭婦人方中最爲急用古人治婦人澤蘭丸甚多  
澤蘭得炒黑豆炮乾薑當歸芎藭乾地黃牛膝益  
母艸赤芍藥蒲黃五靈脂治產後惡露不盡少腹作  
痛俗名兒枕痛寒月加桂多火及內熱虛勞人去桂  
加童便去五靈脂加人參鼈甲香附麥門冬治產後  
諸虛百病肺熱者去人參 雷公云凡使須要別識  
雌雄其形不同大澤蘭莖葉皆圓眼青黃能生血調  
氣養榮氣與小澤蘭迥別採得後看葉上斑根須尖  
此藥能破血通久積凡修事大小澤蘭須細剉之用

絹袋盛懸於屋南畔魚上令乾用 子母秘錄治小兒痔瘡嚼澤蘭心封上澤蘭氣味和平除婦人產後他用甚稀故無簡誤

昆布味鹹寒無毒主十二種水腫癭瘤聚結氣瘰瘡

〔疏〕昆布得水氣以生故味鹹氣寒而性無毒鹹能軟堅其性潤下寒能除熱散結故主十二種水腫癭瘤聚結氣瘰瘡東垣云瘰堅如石者非此不除正鹹能軟堅之功也詳其氣味性能治療與海藻大略相同故同一簡誤也

主治參互

外臺秘要項下卒腫其囊漸大欲成瘰者昆布海藻



等分爲末蜜丸杏核大時時含嚥汁 聖惠方瘦氣

結核癩癩腫硬以昆布一兩洗去鹹曬乾爲散每以一錢綿裹好醋浸過含之嚥汁味盡再易之項下五瘦同此 廣濟方治膀胱結氣急宜下氣用昆布一斤白米泔浸一宿洗去鹹味以水一斛煮熟劈細入葱白一握寸斷之更煮極爛乃下鹽酢摻薑橘椒末調和食之仍食梁米粳米飯極能下氣

防已味辛苦平溫無毒主風寒溫瘧熱氣諸癰除邪利大小便療水腫風腫去膀胱熱傷寒寒熱邪氣中風手腳攣急止洩散癰腫惡結諸痼疥癬蟲瘡通腠理利九

竅



疏防已得土中陽氣而兼感乎秋之燥氣以生故味  
辛苦平溫無毒潔古謂其大苦辛寒爲得之然性燥  
而不瀉善走下行長於除溼以辛能走散兼之氣悍  
故主風寒溫瘧熱氣諸癰除邪氣除溼下行故利大  
小便此本經所載也別錄療水腫風腫去膀胱熱通  
腠理利九竅止泄者皆除溼之功也其曰傷寒寒熱  
邪氣中風手腳攣急則寒非燥藥可除不宜輕試又  
曰散癰腫惡結諸痼疥癬蟲瘡非在下部者亦不宜  
用治溼風口眼喎邪手足拘痛眞由中風溼而病者  
方可用之留痰非由脾胃中溼熱而得者亦不宜服  
肺氣喘嗽不因風寒溼所鬱腠理壅滯者勿用惟治

下焦溼熱腫洩脚氣行十二經溼爲可任耳生漢中  
內有淡黑紋暈如車輻解者良凡修事以車前艸根  
相對蒸半日曬乾殺雄黃毒惡細辛畏草薺女苑鹵  
鹹伏硝石殷孽爲之使

主治參互

凡用防已於下部溼熱藥中亦必以二朮茯苓黃檗  
甘艸草薺木瓜石斛薏苡仁等補益之藥爲主而使  
防已爲使乃無瞑眩之患陶曰防已是療風水要藥  
潔古曰去下焦溼腫及痛并洩膀胱火邪必用漢防  
已龍膽艸爲君黃檗知母甘艸佐之防已乃足太陽  
本經藥也 本艸十劑云通可去滯通艸防已之屬

是也夫防已大苦寒能瀉血中溼熱通其滯塞亦能瀉大便補陰瀉陽助秋冬瀉春夏之藥也比之於人則險而健者也幸災樂禍能首爲亂階然善用之亦可敵凶突險此瞑眩之藥也故聖人存而不廢大抵聞其臭則可惡下咽則令人心煩亂飲食減少至於十二經有溼壅塞不通及下注腳氣暨膀胱積熱非此藥不可真行經之仙藥無可代之者若夫飲食勞倦陰虛生內熱元氣穀食已虧以防已洩大便則重亡其血此不可用一也如人大渴引飲是熱在上焦肺經氣分宜滲泄而防已乃下焦血分藥此不可用二也外傷風寒邪傳肺經氣分溼熱而致小便黃

赤乃至不通此上焦氣病禁用血藥此不可用三也  
大抵上焦溼熱者皆不可用下焦溼熱流入十二經  
致二陰不通者然後審而用之張仲景方治皮水  
肘腫按之沒指不惡風水氣在皮膚中四肢聶聶動  
者防已茯苓湯主之防已黃耆桂枝各三兩茯苓六  
兩甘艸三兩水一升煎半升日二服又方治風水  
惡風汗出身重脈浮防已黃耆湯主之防已一兩黃  
耆二兩二錢半白朮七錢半炙甘艸半兩剉散每服  
五錢生薑四片棗一枚水一盞半煎八分溫服良久  
再服腹痛加芍藥又治風溼相搏關節沈痛微腫  
惡風方同上



防已固爲去下焦血分溼熱之要藥然其性悍其氣  
猛能走竄決防大苦大寒能傷胃氣凡胃虛陰虛自  
汗盜汗口苦舌乾腎虛小水不利及胎前產後血虛  
雖有下焦溼熱慎毋用之犯之爲害非細

天麻味辛平無毒主諸風溼痺四肢拘攣小兒風癇驚  
氣利腰膝強筋力久服益氣輕身

〔疏〕天麻得土之辛味兼感天之陽氣以生故其味辛  
氣平無毒大明云暖浮而升陽也入足厥陰經厥陰  
爲風木之臟諸風溼痺四肢拘攣小兒風癇驚氣皆  
肝臟爲邪氣所客致病天麻入肝味辛氣暖能逐風



溼外邪則肝氣平和前證自瘳矣肝主筋位居於下故能利腰膝強筋力也風溼纏注則身重氣乏能除風溼則身自輕氣自益也凡頭風眩暈與夫痰熱上壅以致頭痛及眩或四肢溼痺麻木小兒風癇驚悸等證所必須之藥

主治參互

同朮半夏黃芩前胡橘皮茯苓治痰厥頭痛同朮橘皮茯苓車前治飲在心下作支滿同南星前胡橘皮白前消一切風痰

簡誤

風藥多燥風能勝溼故也凡病人覺津液衰少口乾

舌燥咽乾作痛大便閉澀病火炎頭暈血虛頭痛及南方似中風皆禁用之

阿魏味辛平無毒主殺諸小蟲去臭氣破癥積下惡氣除邪鬼蠱毒

疏阿魏稟火金之氣而兼得乎天之陽氣故其味辛平溫而無毒氣味俱厚陽也入足太陰陽明經其氣臭烈殊常故善殺諸蟲專辟惡氣辛則走而不守溫則通而能行故能消積利諸竅除穢惡邪鬼蠱毒也蘇恭曰體性極臭而能止臭亦奇物也

主治參互

同人參橘紅京三稜蓬莪茂砂仁治一切肉食堅積

入膏藥同麝香硫黃蘇合油貼一切痞塊 同安息

香百部青黛丹砂治尸疰惡氣

簡誤

阿魏之氣臭烈人之血氣聞香則順聞臭則逆故凡脾胃虛弱之人雖有痞塊堅積不可輕用當先補養胃氣胃氣強則堅積可漸磨而消矣故古人治大積大聚消其大半而止正此謂也

高良薑大溫主暴冷胃中冷逆霍亂腹痛

疏高良薑稟地二之氣以生本經大溫藏器辛溫元

素辛熱純陽浮也入足陽明太陰經二經爲客寒所犯則逆冷霍亂腹痛諸病生焉辛溫煖脾胃而逐寒

邪則胃中冷逆自除霍亂腹痛自愈矣甄權治腹內久冷氣痛去風冷痺弱大明主轉筋瀉痢反胃解酒毒消宿食蘇頌治惡心嘔清水皆取其煖胃溫中散寒祛冷之功也

主治參互

外臺秘要霍亂吐利高良薑炙令香每用五兩以酒一升煮三四沸頓服亦治腹痛中惡 普濟方霍亂嘔甚不止用高良薑生剉二錢大棗一枚水煎冷服立定 永類鈐方心脾冷痛用高良薑三錢五靈脂六錢爲末每服三錢醋湯調下

高良薑辛溫大熱惟治客寒犯胃胃冷嘔逆及傷生  
冷飲食致成霍亂吐瀉之要藥如胃火作嘔傷暑霍  
亂火熱注瀉心虛作痛法咸忌之

百部根微溫

蜀本云微寒

主嗽嗽上氣

〔疏〕百部根正得天地陰寒之氣故蜀本云微寒日華

子言苦本經言微溫者誤也苦而下洩故善降肺氣

升則喘嗽故善治嗽嗽上氣能散肺熱故藥性論主

潤益肺其性長於殺蟲傳尸骨蒸勞往往有蟲故亦

主之疝熱有蟲及虻蟲寸白蟲蟯蟲皆能殺之又燒

熏樹木蛀蟲觸烟卽死亦殺蠅蠊日華子論之詳矣

陶云殺蝨濃煎洗牛馬蝨卽去陳藏器云火炙酒浸



本州總疏 卷九  
空腹飲去蟲蠶咬兼疥癬瘡

主治參互

同桑根白皮天麥二冬貝母枇杷葉五味子紫菀治一切虛嗽但不能治食積嗽 千金方單用一味熬膏入蜜不時取服可療三十年嗽 楊氏經驗方治遍身黃腫取鮮百部根洗擣罨臍上以糯米飯半升拌酒半合揉和蓋在藥上用帛包住過一二日後口內作酒氣則水從小便出腫自消矣 聖濟總錄百蟲入耳百部炒研細末生油調敷耳門上

簡誤

百部味苦脾虛胃弱人宜兼保脾安胃藥同用庶不

傷胃氣

藿香子味辛平無毒主諸癩霍亂及蛇傷

〔疏〕藿香得土金之冲氣而兼稟乎天之陽故其味辛平亦應兼甘無毒辛香發散甘平和胃入足太陰陽明太陽少陰經故主霍亂香氣先入脾脾主肌肉故主諸癩脾主四肢故主腳氣通腎氣膀胱爲腎之腑故主膀胱腎間冷氣及治疝氣胃和則熱解熱解則口臭自除

主治參互

藿香酒炒得川楝子荔枝核橘核肉桂蒼朮木瓜牛膝治寒溼成疝得炒砂仁食鹽則主中惡腹痛霍

亂腹痛吐逆 古方惡毒癰腫或連陰髀間疼痛急  
攣牽入少腹不可忍一宿則殺人者用藁香苗葉搗  
取汁一升服之日三四進用其滓以貼腫上冬間根  
亦可用此外國方永嘉已來用之起死神效

簡誤

藁香辛溫胃腎多火陽道數舉得熱則嘔者勿服  
欵冬花味辛甘溫無毒主嗽逆上氣善喘喉痺諸驚癇  
寒熱邪氣消渴喘息呼吸

〔疏〕欵冬花得天地陰寒之氣而兼稟乎金水之性故  
凌冰雪而獨秀其味辛甘溫而無毒陰中含陽降也  
辛能散而能潤甘能緩而能和溫則通行不滯善能

降下嗽逆上氣善喘喉痺諸驚癇寒熱邪氣消渴喘  
息呼吸一皆氣升火炎之病也氣降則火自降氣降  
則陽交於陰水火既濟既濟則火不上炎氣不逆升  
肺不受邪得清肅之常道而諸證自退矣杏仁爲之  
使得紫苑良

主治參互

欵冬花雖畏貝母然得貝母桑根白皮紫苑枇杷葉  
栝樓根百部天麥門冬杏仁治喘逆及嗽嗽反良物  
有相制故也如半夏畏生薑得之則制其毒而愈能  
奏效也 得麻黃杏仁桑根白皮甘艸治風寒鬱實  
熱於上焦肺分作喘其效甚速 一味燒烟吸之治

喘嗽具如本艸注中所載 濟生方痰嗽帶血欵冬  
花百合蒸焙等分爲末蜜丸龍眼大每臥時嚼一九  
薄荷湯下 欵冬花古今方用之爲治嗽要藥以其  
辛溫散而能降於肺無迕無分寒熱虛實皆可施用  
故無簡誤

紅藍花味辛溫無毒主產後血暈口噤腹內惡血不盡  
絞痛胎死腹中竝酒煮服亦主蠱毒下血堪作燕脂其  
苗生搗碎傅遊腫其子吞數顆主天行瘡子不出其燕  
脂主小兒聾耳滴耳中

〔疏〕紅藍花稟土與火之氣潔古海藏皆兼甘苦溫陰  
中之陽故入心海藏以爲肝經血分藥也入酒良乃



行血之要藥其主產後血暈口噤者緣惡血不下逆  
上衝心故神昏而暈及口噤入心入肝使惡血下行  
則暈與口噤自止腹內絞痛由於惡血不盡胎死腹  
中非行血活血則不下瘀行則血活故能止絞痛下  
死胎也凡蠱藥之毒必傷血分此藥能行血活血則  
毒可解子主天行瘡子者痘瘡因血分有毒血行則  
毒散故主之也小兒聾耳亦血凝也血散則耳腫自  
消矣

主治參互

熱病胎死腹中新汲水濃煮紅藍花汁和童便熱飲  
之立瘥胞衣不下產後血暈竝同此法無不立效

同延胡索當歸生地黃牛膝赤芍藥益母艸川芎或  
丸或煎治經阻少腹作痛及結塊良 其子主天行  
痘瘡血熱有功宜同生犀角紫艸生地黃用 燕脂  
其汁所造也痘瘡初發時以之抹眼眶及眼角可免  
瘡子入眼 同薄荷金絲荷葉汁入礬末少許滴入  
耳中治聾耳 同冰片真珠細末治痘毒及痘疔剔  
破令人吮出惡血抹入瘡眼中良

簡誤

紅藍花本行血藥也血暈解留滯行卽止過用能使  
血行不止而斃世人所不知者

牡丹味辛苦寒微寒無毒主寒熱中風痲癰瘰癧驚癇邪

氣除癥堅瘀血留舍腸胃安五藏療癰瘡除時氣頭痛  
客熱五勞勞氣頭腰痛風噤癰疾

疏牡丹皮稟季春之氣而兼得乎木之性陰中微陽  
其味苦而微辛其氣寒而無毒其色赤而象火故入  
手少陰厥陰足厥陰亦入足少陰經辛以散結聚苦  
寒除血熱入血分涼血熱之要藥也寒熱者陰虛血  
熱之候也中風痙瘓痲驚癰皆坐陰虛內熱榮血不  
足之故熱去則血涼涼則新血生陰氣復陰氣復則  
火不炎而無因熱生風之證矣故悉主之癰瘡者熱  
壅血瘀而成也涼血行血故療癰瘡辛能行血苦能  
泄熱故能除血分邪氣及癥堅瘀血留舍腸胃臟屬

陰而藏精喜清而惡熱熱除則五臟自安矣別錄并  
主時氣頭痛客熱五勞勞氣頭腰痛者泄熱涼血之  
功也甄權又主經脈不通血滯腰痛此皆血因熱而  
枯之候也血中伏火非此不除故治骨蒸無汗及小  
兒天行痘瘡血熱束垣謂心虛腸胃積熱心火熾甚  
心氣不足者以牡丹皮爲君亦此意也忌胡荽赤花  
者利白花者補

主治參互

神不足者手少陰志不足者足少陰故仲景腎氣丸  
用之治神志之不足究竟牡丹皮乃入心經正藥心  
主血涼血則心不熱而陰氣得寧用之腎經藥中者

陰陽之精互藏其宅神志水火藏於心腎卽身中坎  
離也交則陰陽和而百病不生不交則陰陽否而精  
神離矣欲求弗夭其可得乎 入清胃散治陽明胃  
經血熱齒痛 潔古曰葉爲陽發生也花爲陰成實  
也丹者赤色火也故能瀉陰胞中之火四物湯加之  
治婦人骨蒸又曰牡丹皮入手厥陰足少陰故治無  
汗之骨蒸然須與青蒿子天麥門冬沙參地黃五味  
子牛膝枸杞之屬同用始得其力

簡誤

牡丹皮本入血涼血之藥然能行血凡婦人血崩及  
經行過期不淨竝忌與行血藥同用



京三稜味苦平無毒主老癖癥瘕結塊俗傳昔人患癥癖死遺言令開腹取之得病塊堅硬如石文理有五色人謂異物竊取削成刀柄後因以刀刈三稜柄消成水乃知此可療癥癖也黃色體重狀若鯽魚而小者良

〔疏〕京三稜稟火土之氣故本經味苦平潔古兼甘亦應兼辛兼甘故無毒入足厥陰亦入足太陰從血藥則治血從氣藥則治氣老癖癥瘕積聚結塊未有不

由血瘀氣結食停所致苦能泄而辛能散甘能和而入脾血屬陰而有形此所以能治一切凝結停滯有形之堅積也又主產後惡血血結通月水墮胎止痛利氣者亦散血行氣之功用也潔古用以治心膈痛

飲食不消海藏用以通肝經積血皆與作者之意合也

主治參互

同蓬莪茂青皮香附延胡索肉桂牡蠣鼈甲人參則消一切堅癥老癖之積聚 同青皮紅藍花當歸川芎生地黃芍藥桂心牛膝延胡索五靈脂則治產後一切惡血停滯留結及月水凝蓄不通少腹作痛不可按 同橘皮青皮縮砂蜜紅麴山查麥芽人參肉豆蔻黃連則消一切食積并氣壅塞不利 子母秘錄治小兒氣癖三稜煮汁作羹粥與奶母食日亦以棗許與兒食小兒百日及十歲已下痢熱疰癖皆理

之合人參彌良

簡誤

京三稜潔古謂其辛苦甘無毒陰中之陽能瀉真氣  
 真氣虛者勿用此見諦之言也故凡用以消導必資  
 人參芍藥地黃之力而後可以無弊觀東垣五積方  
 皆有人參意可知已何者蓋積聚癥癖必由元氣不  
 足不能運化流行致之欲其消也必藉脾胃氣旺能  
 漸漸消磨開散以收平復之功如祇一味專用克消  
 則脾胃之氣愈弱後天之氣益虧將見故者不去新  
 者復至矣戒之哉

薑黃味辛苦大寒無毒主心腹結積注忤下氣破血除

風熱消癰腫功力烈於鬱金

鬱金能下血

疏薑黃得火氣多金氣少故其味苦勝辛劣辛香燥  
烈性不應寒宜其無毒陽中陰也降也入足太陰亦  
入足厥陰經苦能泄熱辛能散結故主心腹結積之  
屬血分者兼能治氣故又云下氣總其辛苦之力破  
血除風熱消癰腫其能事也日華子謂其能治癥瘕  
血塊又通月經及撲損瘀血蘇頌謂其祛邪辟惡治  
氣脹及產後敗血攻心方書用以同肉桂枳殼治右  
脇痛臂痛有效戴元禮云能入手臂治痛何莫非下  
氣破血辛走苦洩之功歟察其氣味治療乃介乎京  
三稜鬱金之藥也



主治參互

得當歸生地黃牛膝延胡索肉桂治一切積血在腹  
中作痛 經驗方治中寒心痛難忍薑黃一兩桂三  
兩為末醋湯服一錢 產寶方治產後血痛有塊用  
薑黃桂心等分為末酒服方寸匕血下盡即愈

簡誤

凡病人因血虛臂痛血虛腹痛而非瘀血凝滯氣逆  
上壅作脹者切勿誤用誤則愈傷血分令病轉劇慎  
之慎之

青黛味鹹寒無毒主解諸藥毒小兒諸熱驚癇發熱天  
行頭痛寒熱並水研服之亦摩傅熱瘡惡腫金瘡下血



蛇犬等毒染澱亦堪傳熱毒惡腫蛇虺螫毒

疏青黛外國藍靛之英華也稟水土陰寒之氣以生故味鹹寒而無毒甄權謂其甘平以其得土氣之厚也故可解諸藥毒及小兒諸熱驚癇發熱天行頭痛寒熱並水研服之亦磨傳熱瘡惡腫金瘡下血蛇犬等毒波斯國來及太原產者勝如不可得卽用染甕浮沫之紫碧色者亦可

主治參互

得蕪荑使君子肉胡黃連蘆薈殺蟲除熱及小兒一切疳積病 醫學正傳治心口熱痛薑汁調一錢服之 聖惠方治內熱吐血青黛二錢新汲水下 中

藏經治肺熱咯血用青黛一兩杏仁以牡蠣粉炒過  
一兩研勻黃蠟化和作三十餅子方名青餅子每服  
一餅以乾柿半箇夾定溼紙裏煨香嚼食粥飲送下  
日三服 生生編治小兒夜啼青黛水研服之 宮  
氣方治小兒疳痢歌云孩兒雜病變成疳不問強羸  
女與男煩熱毛焦鼻口燥皮膚枯槁四肢癱腹中時  
時更下痢青黃赤白一般般眼澀面黃鼻孔赤穀道  
開張不可看此方便是青黛散孩兒百病服之安  
活人書治傷寒赤斑青黛二錢水研服

簡誤

青黛既稟陰寒之氣而生解毒除熱固其所長古方

多有利用之於諸血症者使非血分實熱而病生於陰虛內熱陽無所附火氣因空上炎發爲吐衄咯唾等證用之非宜血得寒則凝凝則寒熱交作胸膈或痛愈增其病矣醫師宜詳辨之

鬱金味辛苦寒無毒主血積下氣生肌止血破惡血血淋尿血金瘡

〔疏〕鬱金稟天令清涼之氣而兼得土中金火之味故其味辛苦其氣寒而無毒潔古論氣味俱薄陰也降也入酒亦能升入手少陰足厥陰兼通足陽明經辛能散苦能洩故善降逆氣入心肝胃三經故治血積氣降而和則血凝者散故主生肌止血其破惡血治

血淋尿血主金瘡者調氣行血之功也單用亦治女人宿血氣心痛冷氣結聚溫醋磨服之入心涼血故潔古用以涼心入足陽明故治陽毒入胃下血頻痛其性輕揚能開鬱滯故為調逆氣行瘀血之要藥

主治參互

鬱金同韭菜番降香當歸生地黃童便能治怒氣傷肝吐血又治鼻衄唾血喉中血腥氣及經脈逆行有痰方加竹瀝 鬱金七兩同明礬三兩為細末薄米糊為丸梧子大每服五十丸白湯下昔人曾治婦人癲狂十年不愈初服此藥心胸間有物脫去即神氣洒然再服而蘇此驚憂痰血總聚心竅所致此藥入

心去惡血明礬化頑痰故也 龐安常傷寒論云痘

癍始有白泡忽搐入腹漸作紫黑色無膿日夜叫亂者鬱金一枚甘艸二錢半水半碗煮乾去甘艸切片微火烘燥爲末入真片腦半錢每用一錢以生豬尾血五七滴新汲水調下不過二服甚者毒氣從手足心出如癰狀乃瘥此乃五死一生之候也 又范石

湖文集云嶺南有采生之害其術於飲食中行厭勝法致魚肉能反生於人腹中而人已死則陰役其家初得覺胸腹痛次日刺人十日則生在腹中也凡胸膈痛卽用升麻或膽礬吐之若膈下痛急以米湯調鬱金末二錢服卽瀉出惡物或合升麻鬱金服之不



吐則下李巽巖侍郎爲雷州推官鞠獄得此方活人甚多

簡誤

鬱金本入血分之氣藥其治已上諸血證者正謂血之上行皆屬於內熱火炎此藥能降氣氣降卽是火降而其性又入血分故能降下火氣則血不妄行丹溪不達此理乃謂其上行治血則誤矣凡病屬真陰虛極陰分火炎薄血妄行溢出上竅而非氣分拂逆肝氣不平以致傷肝吐血者不宜用也卽用之亦無效

蘆薈味苦寒無毒主熱風煩悶胸膈間熱氣明目鎮心

小兒癩癘驚風療五疳殺三蟲及痔病瘡癭解巴豆毒俗呼爲象膽蓋以其味苦如膽故也生波斯國似黑錫〔疏〕蘆薈稟天地陰寒之氣故其味苦其氣寒其性無毒寒能除熱苦能泄熱燥溼苦能殺蟲至苦至寒故爲除熱殺蟲之要藥其主熱風煩悶胸脇間熱氣明目鎮心小兒癩癘驚風療五疳殺三蟲者熱則生風熱能使人煩悶熱除則風熱煩悶及胸膈間熱氣自解涼肝故明目除煩故鎮心小兒癩癘驚風熱所化也五疳同爲內熱脾胃停滯之證三蟲生於腸胃溼熱痔病瘡癭亦皆溼熱下客腸臟致血凝滯之所生故悉主之能解巴豆毒亦除熱之力也詳其功用是

本草綱目卷之六  
足厥陰足太陰二經藥亦可兼入手少陰經

主治參互

同厚朴橘紅甘艸青黛蕪荑百艸霜旋復花爲末以砂仁湯吞治小兒諸疳一歲一分甚效 衛生易簡方治脾疳與使君子等分爲末每服一二錢米飲調下 李恂用以主小兒諸疳熱 甄權單用殺疳虻及吹鼻殺腦疳除鼻癢 蘇頌研末傅鬩齒甚效治溼癬出黃水有神 治大便不通真蘆薈研細七錢硃砂研如飛麩五錢滴好酒和丸每服三錢酒吞朝服暮通暮服朝通須天晴時修合爲妙

簡誤

其味至苦其性大寒主消不主補凡兒脾胃虛寒作瀉及不思食者禁用

延胡索味辛溫無毒主破血產後諸病因血所爲者婦人月經不調腹中結塊崩中淋露產後血暈暴血衝上因損下血或酒摩及煮服

**疏**延胡索稟初夏之氣而兼得乎金之辛味故味辛氣溫而無毒入足厥陰亦入手少陰經溫則能和暢和暢則氣行辛則能潤而走散走散則血活血活氣行故能主破血及產後諸病因血所爲者婦人月經之所以不調者無他氣血不和因而凝滯則不能以時至而多後期之證也腹中結塊產後血暈暴血衝

上因損下血等證皆須氣血和而後愈故悉主之也  
崩中淋露利守不利走此則非與補氣血藥同用未  
見其可

主治參互

君當歸生地黃牛膝益母艸童便則主產後血暈有  
神得四物湯白膠牛膝香附則主婦人經阻少腹  
作痛或結塊活人書治小便尿血用延胡索一兩  
朴硝七錢半爲末每服四錢水煎服非蓄血瘀滯者  
不可用勝金方治膜外氣疼及氣塊延胡索不限  
多少爲末豬胰一具切作塊子炙熟蘸末頻食之  
聖惠方治熱厥心痛或發或止久不愈身熱足寒者



用延胡索去皮金鈴子肉等分爲末每溫酒或白滾湯下二錢 濟生方治婦女血氣腹中刺痛經候不調用延胡索去皮醋炒當歸酒浸炒各一兩橘紅二兩爲末酒煮米糊丸梧子大每服一百丸空心艾醋湯下 聖惠方治產後諸病凡產後穢污不盡腹滿及產後血暈心頭硬或寒熱不禁或心悶手足煩熱氣力欲絕諸病竝用延胡索炒研酒服二錢 直指方治疝氣危急用延胡索鹽水炒全蝎去毒生用等分爲末空心鹽酒下 又方治冷氣腰痛用延胡索當歸桂心等分爲末溫酒服三四錢隨量頻進以止爲度 聖惠方治墜落車馬筋骨痛不止延胡索末

豆淋酒服二錢日二服

簡誤

此藥性溫味辛能走而不能守故經事先期及一切血熱為病凡崩中淋露皆應補氣血涼血清熱則愈一切辛走之藥法所應禁

肉豆蔻味辛溫無毒主鬼氣溫中治積冷心腹脹痛霍亂中惡冷症嘔沫冷氣消食止洩小兒乳霍糯米粉裹煨去粉搗碎忌銅鐵器

疏肉豆蔻稟火土金之氣故味辛氣溫而無毒入足太陰陽明經亦入手陽明大腸辛味能散能消溫氣能和中通暢其氣芬芳香氣先入脾胃主消化溫和

而辛香故開胃胃喜煖故也故爲理脾開胃消宿食  
止洩瀉之要藥香能辟惡除不祥又中氣不虛則邪  
惡之氣不能入故主鬼氣及溫中脾主中焦胃爲後  
天生氣之本脾胃之陽氣旺則積冷心腹脹滿霍亂  
中惡冷症嘔沫冷氣食不消洩不止小兒乳霍諸證  
自除矣

### 主治參互

君人參補骨脂吳茱萸五味子砂仁爲治腎泄及冷  
泄之聖藥 得縮砂蜜橘皮人參紅麴山查肉霍香  
麥芽爲開胃進飲食消宿食止瀉之上劑 獨用修  
事爲末以棗肉和丸或爲末縮砂湯下名公子登筵

散言服之即可赴席其開胃進食消導之功烈矣

百一選方治久瀉不止用肉豆蔻一兩木香二錢五分爲末棗肉和丸米飲下四五十丸又方肉豆蔻煨一兩熟附子七錢爲末糊丸米飲服四五十丸又瑞竹堂方治老人虛瀉肉豆蔻三錢煨研乳香一兩爲末全幼心鑑治小兒泄瀉用肉豆蔻五錢乳香二錢半生薑五片同炒黑色去薑研爲膏收入密器旋丸棗豆大每量大小米飲下聖惠方治冷痢腹痛不能食者肉豆蔻一兩去皮醋和麩裏煨擣末每服一錢粥飲調下

簡誤



大腸素有火熱及中暑熱泄暴注腸風下血胃火齒痛及溼熱積滯方盛滯下初起皆不宜服

補骨脂味辛大溫無毒主五勞七傷風虛冷骨髓傷敗

腎冷精流及婦人血氣墮胎一名破故紙

忌羊肉諸血得胡桃良

疏補骨脂稟火土之氣而兼得乎天令之陽故其味辛其氣大溫性則無毒陽中微陰降多升少入手厥陰心包絡命門足太陰脾經能煖水臟陰中生陽壯火益土之要藥也其主五勞七傷蓋緣勞傷之病多起於脾腎兩虛以其能煖水臟補火以生土則腎中真陽之氣得補而上升則能腐熟水穀蒸糟粕而化精微脾氣散精上歸於肺以榮養乎五臟故主五臟



之勞七情之傷所生病風虛冷者因陽氣衰敗則風  
冷乘虛而客之以致骨髓傷敗腎冷精流腎主骨而  
藏精髓乃精之本真陽之氣不固卽前證見矣固其  
本而陽氣生則前證自除男子以精爲主婦人以血  
爲主婦人血氣者亦猶男子陽衰腎冷而爲血脫氣  
陷之病同乎男子之腎冷精流也大溫而辛火能消  
物故能墮胎

### 主治參互

三因方治精氣不固用破故紙青鹽等分同炒爲末  
每服二錢米飲下 普濟方治小便無度腎氣虛寒  
用破故紙十兩酒蒸茴香十兩鹽炒爲末酒糊丸梧

子大每服百丸鹽酒下或以末糝豬腎煨食之 嬰

童百問治小兒遺尿膀胱冷也夜屬陰故小便不禁

用破故紙炒爲末每夜熱湯服五分 和劑方補骨

脂丸治下元虛敗腳手沈重夜多盜汗縱慾所致此

藥壯筋骨益元氣補骨脂四兩炒香菟絲子四兩酒

蒸胡桃肉一兩去皮沈香研細一錢半煉蜜丸如梧

子大每服二三十丸空心鹽湯溫酒任下自夏至起

冬至止日一服此乃唐宣宗時張壽太尉知廣州得

方於南番人有詩云三年時節向邊隅人信方知藥

力殊奪得春光來在手青蛾休笑白髭鬚 經驗方

治虛勞男子女人五勞七傷下元虛冷一切風病四

肢疼痛駐顏壯氣烏髭鬚用補骨脂一斤酒浸一宿  
曬乾卻用烏油麻一升和炒令麻子聲絕簸去只用  
補骨脂爲末醋煮麩糊丸如梧子大每服二三十丸  
空心溫酒鹽湯任下 又方治腎虛腰痛用破故紙  
一兩炒爲末溫酒服三錢神效或加木香一錢 和  
劑局方青娥丸治腎氣虛弱風冷乘之或血氣相搏  
腰痛如折俛仰不利或因勞役傷腎或溼痺傷腰或  
墮跌損傷或風寒客搏或氣滯不散皆令腰痛或腰  
間如物重墜用破故紙酒浸炒一斤杜仲去皮切片  
薑汁炒一斤胡桃肉去皮二十箇爲末以蒜搗膏一  
兩和丸梧子大每空心溫酒服二十九婦人淡醋湯

下常服壯筋骨活血脈烏髭鬚益顏色 夏子益奇

疾方治玉莖不痿精滑無歇時時如鍼刺捏之則脆  
此名腎漏用破故紙韭子各一兩爲末每用三錢水

一二盞煎六分服日三次愈則止 二神丸治脾腎虛

瀉用破故紙炒半斤肉豆蔻生用四兩爲末肥棗研

膏和丸梧子大每服五七十丸空心米飲下本事方

加木香二兩名三神丸 直指方治打墜腰痛瘀血

凝滯用破故紙炒茴香炒辣桂等分爲末每熱酒服

一二錢 唐鄭相國自敘云予爲南海節度年七十五

粵地卑溼傷於內外眾疾俱作陽氣衰絕服乳石補

藥百端不應元和七年有訶陵國舶主李摩訶知子



病狀遂傳此方并藥予初疑而未服摩訶稽首固請  
遂服之經七八日而覺應驗自爾常服其功神效十  
年二月罷郡歸京錄方傳之用破故紙十兩淨去皮  
洗過暴乾酒浸蒸再暴搗篩令細胡桃瓢二十兩湯  
浸去皮細研如泥更以好蜜和令如飴糖瓷器盛之  
旦日以煖酒二合調下十匙服之便以飯壓如不飲  
酒人以煖熟水調之餌久則延年益氣悅心明目補  
添筋骨但禁芸臺羊肉餘無所忌此物本自外番隨  
海舶而來非中華所有番人呼爲補骨脂語譌傳爲  
破故紙也王紹顏續傳信方載其事頗詳故錄之  
按白飛霞方外奇方云破故紙屬火收斂神明能使



心包之火與命門之火相通故元陽堅固骨髓充實  
瀝以治脫也胡桃屬木潤燥養血血屬陰惡燥故油  
以潤之佐破故紙有木火相生之妙故語云破故紙  
無胡桃猶水母之無蝦也

簡誤

補骨脂陽藥也凡病陰虛火動陽道妄舉夢遺尿血  
小便短瀝及目赤口苦舌乾大便燥結內熱作渴火  
升目赤易飢嘈雜溼熱成痿以治骨乏無力者皆不  
宜服

縮砂蜜味辛溫無毒主虛勞冷瀉宿食不消赤白泄痢  
腹中虛痛下氣

〔疏〕縮砂蜜稟天地陽和之氣以生故其味辛其氣溫其性無毒入足太陰陽明少陰厥陰亦入手太陰陽明厥陰可升可降降多於升陽也辛能散又能潤溫能和暢通達虛勞冷瀉脾腎不足也宿食不消脾胃俱虛也赤白滯下胃與大腸因虛而溼熱與積滯客之所成也辛以潤腎故使氣下行兼溫則脾腎之氣皆和和則冷瀉自止宿食自消赤白滯下自愈氣下則氣得歸元故腹中虛痛自己也甄權用以止冷氣痛止休息痢消化水穀溫煖肝腎陳藏器用以主上氣奔豚鬼疰邪氣鬼疰必由於脾腎兩虛陰陽乏絕故也日華子用以主一切氣轉筋霍亂轉筋霍亂必

由脾胃爲邪所干胃氣壅滯閉塞而成楊氏用以止痛安胎氣結則作痛氣逆則胎不安潔古用以治脾胃氣結滯不散皆下氣散結溫中和胃入脾入腎入肝入命門入大腸之故耳

主治參互

縮砂蜜氣味辛溫而芬芳香氣入脾辛能潤腎故爲開脾胃之要藥和中氣之正品若兼腎虛氣不歸元非此爲向導不濟殆勝桂附熱毒之害多矣好古謂得人參益智則入脾得黃檗茯苓則入腎得赤白石脂則入大小腸也 得人參橘皮藿香白茯苓白芍藥炙甘艸治泄瀉兼嘔吐及不思食 得藿香橘皮

木瓜治霍亂轉筋腹痛吐瀉 獨用兩許炒爲末入  
食鹽三錢滾湯一碗泡浸冷服治乾霍亂累效 白藥  
性論治冷滑下痢不禁瘦羸以縮砂仁爲末以羊子  
肝薄切糝之瓦上焙乾爲末入乾薑末等分飯丸梧  
子大每四十大白湯下日二服 直指方治遍身腫  
滿陰亦腫者用縮砂仁土狗一箇等分研和老酒服  
之 簡便方治痰氣膈脹用砂仁搗碎以蘿蔔汁浸  
透焙乾爲末每服二錢食遠沸湯服 簡便方治上  
氣欬逆用砂仁洗淨炒研生薑連皮等分搗爛熱酒  
食遠泡服 溫隱居方治子癰昏冒用砂仁和皮炒  
黑熱酒調下二錢不飲者米飲下此方安胎止痛其

效不可盡述 孫尚藥方治妊娠胎動偶因所觸或  
跌墮傷損致胎不安痛不可忍者用砂仁熨斗炒熱  
去皮用仁擣碎每服二錢熱酒調下須臾覺腹中胎  
動極熱卽胎已安矣神效 婦人良方治婦人血崩  
用砂仁於新瓦上焙研末米飲服三錢 直指方治  
牙齒疼痛縮砂仁常嚼之良 事林廣記治一切食  
毒用砂仁末水服二錢

簡誤

縮砂蜜氣味辛溫陽藥也凡腹痛屬火泄瀉得之暑  
熱胎動由於血熱咽痛由於火炎小兒脫肛由於氣  
虛腫滿由於溼熱上氣欬逆由於火衝迫肺而不由



於寒氣所傷皆須詳察簡別難以槩用誤則有損無益勿易視也本非肺經藥今亦有有用之於欬逆者通指寒邪鬱肺氣不得舒以致欬逆之證若欬嗽多緣肺熱此藥卽不應用矣

蓬莪茂味苦辛溫無毒主心腹痛中惡症忤鬼氣霍亂冷氣吐酸水解毒食飲不消酒磨服之又療婦人血氣丈夫奔狔

〔疏〕蓬莪茂感夏末秋初之氣而得土金之味故其味苦辛其氣溫而無毒陽中陰降也入足厥陰肝經氣分能破氣中之血入氣藥發諸香主積聚諸氣爲最要之藥與京三稜同用之良心腹痛者非血氣不得

調和卽是邪客中焦所致中惡疰忤鬼氣皆由氣不  
調和臟腑壅滯陰陽乖隔則疫癘疰忤鬼氣得以憑  
之茂氣香烈能調氣通竅竅利則邪無所容而散矣  
解毒之義亦同乎是其主霍亂冷氣吐酸水及飲食  
不消皆行氣之功也故多用酒磨又療婦人血氣結  
積丈夫奔狽入肝破血行氣故也多用醋磨鬱金入  
心亦入肝專主血分亦散肝鬱茂與三稜專能行氣  
破積薑黃行氣破血入脾爲多

主治參互

得人參橘皮縮砂蜜京三稜肉豆蔻青皮麥蘗穀蘗  
木香消一切飲食停滯積聚及小兒癥癖甚良 楊

于建護命方治一切冷氣衝心切痛發即欲死久患

心腹痛時發者蓬莪茂醋煮二兩木香煨一兩為末

淡醋湯下半錢 普濟方治婦人血氣遊走作痛及

腰痛茂同乾漆等分為末酒服二錢腰痛核桃酒下

保幼大全治小兒盤腸內釣痛以茂半兩用阿魏

一錢化水浸週時焙研紫蘇湯下一字 十全普救

方治小兒氣痛以茂炮熟為末熱酒服一錢 保幼

大全治初生吐乳不止用茂少許鹽二釐乳一合煎

三五沸去滓入牛黃二釐服之甚效 危氏得效方

治渾身燎炮每箇出水有鱗一片如指甲大其泡復

生抽盡肌肉即不可治用茂同三稜各五錢為末分

三服酒調連進愈

簡誤

逢莪茂行氣破血散結是其功能之所長若夫婦人

小兒氣血兩虛脾胃素弱而無積滯者用之反能損

真氣使食愈不消而脾胃益弱即有血氣凝結飲食

積滯亦當與健脾開胃補益元氣藥同用乃無損耳

白前味甘微溫

蜀本云微寒

無毒主胸脇逆氣咳嗽上氣

〔疏〕白前感秋之氣而得土之冲味故味甘辛氣微溫

蘇恭又謂微寒性無毒陽中之陰降也入手太陰肺

家之要藥甘能緩辛能散溫能下以其長於下氣故

主胸脇逆氣咳嗽上氣二病皆氣升氣逆痰隨氣壅



所致氣降則痰自降能降氣則病本立拔矣微溫微寒見人參條下

主治參互

寇宗奭曰白前能保定肺氣治嗽多用以溫藥相佐使尤佳 仲景金匱要略治嗽而脈浮用澤漆湯中有白前苗似細辛而大根色白亦似白微又似牛膝脆而易折不若白微之可彎而不折也苦者非是 外臺方治久嗽吐血用白前桔梗桑根白皮各三兩甘艸炙一兩水一升煮一升分三服忌豬肉菘菜 深師方治久咳上氣體腫短氣晝夜倚壁不得臥常作水雞聲者白前湯主之白前二兩紫苑半夏各三



兩大戟七合以水一斗漬一宿煮取三升分作數十服第進一服勿相繼以須藥力之行

簡誤

白前辛溫走散下氣之藥性無補益凡欬逆上氣欬嗽氣逆由於氣虛氣不歸元而不由於肺氣因邪客壅實者禁用深師方中所主久欬上氣體腫短氣脹滿當是有停飲水溼溼痰之病乃可用之病不由於此者不得輕施

白藥味辛溫無毒主金瘡生肌

①疏白藥稟天地清寒之氣而兼金水之性故味辛經云氣溫日華子云冷當是辛寒之藥無疑故無毒而

能解毒金瘡出血過多必發熱熱則作痛不得生肌  
矣涼血清熱則其痛自止肌自生也又藥性論亦可  
單用味苦能治喉中熱塞噎痺不通胸中隘塞咽中  
常痛腫脹日華子云性冷消痰止嗽治渴并吐血喉  
閉消腫毒又云剪艸根名白藥詳味二條所主皆解  
熱散結之功則其爲寒明矣入肺入胃不言可知

主治參互

施州人取白藥子并野豬尾二味洗淨去麤皮焙乾  
等分爲末酒調服二錢許療心氣痛解熱毒甚效

又諸瘡癰腫不散者取生根爛擣傅貼乾則易之無  
生者用細末水調服之亦可 崔元亮海上方治一

切天行熱病取白藥研如麪二錢漿水一大盞空腹  
頓服之便仰臥一食頃候心頭悶亂或惡心腹內如  
車鳴疔刺痛良久當有吐利數行勿怪欲服藥時先  
令煮漿水粥於井中懸著待冷若吐利過度卽喫冷  
粥一碗止之不喫卽困人 經驗方治妊娠傷寒護  
胎以白藥子爲細末雞子清調攤於綿紙上可如碗  
大自臍貼至臍下胎存生處乾卽以溼水潤之 衍  
義又爲治馬肺熱藥有效 聖惠方治風熱上壅咽  
喉不利白藥三兩黑牽牛五錢同炒香去牽牛一半  
爲末防風末三兩和勻每一錢水調服 又方治吐  
血不止白藥煨存性糯米飲服三錢 又方治咽喉

腫痛白藥末一兩龍腦香二分五釐生蜜和丸芡實  
大每含嚥一丸 又方名鐵罩散治胎熱不安用白  
藥子一兩白芷五錢爲末每服二錢紫蘇湯下心煩  
熱入白砂糖少許 經驗良方治衄血不止紅棗肉  
白藥各煨存性等分爲末糯米飲調服二錢許

簡誤

苦寒辛散之物凡病雖有血熱吐衄等證若脾胃素  
弱易於作泄者勿服

莎艸根味甘微寒無毒主除胸中熱充皮毛久服令人  
益氣長鬚眉

疏莎艸根稟天地溫燥之氣而兼得乎土金之味故

其味甘應有苦辛微寒亦應微溫無毒入足厥陰氣  
分亦入手太陰經氣厚於味陽中之陰降也血中之  
氣藥也能行十二經八脈氣分得童子小便苦酒漬  
過良芎藭爲之使辛主散苦溫主降泄肝主怒而苦  
急肺苦氣上逆而主皮毛怒則氣上逆逆則胞中熱  
降則肝氣平而胸中熱除肺得安而皮毛自充鬚眉  
自長矣其云久服益氣者是亦調氣之功也蘇頌又  
謂治心腹中客熱膀胱間連脇下氣妨常日憂愁不  
樂心忪少氣東垣治一切氣霍亂吐瀉腹痛腎氣膀  
胱冷氣世醫專用以治婦人崩漏帶下月經不調者  
皆降氣調氣散結理滯之所致也蓋血不自行隨氣



而行氣逆而鬱則血亦凝澀氣順則血亦從之而和  
暢此女人崩漏帶下月事不調之病所以咸須之耳  
然須輔之以益血涼血之藥氣虛者兼入補氣藥乃  
可奏功也海藏云本艸不言治崩漏而方中用治崩  
漏是能益氣而止血也又能逐去瘀血是推陳也凡  
氣鬱血滯必用之藥童便浸透炒黑能止血治崩漏

主治參互

香附一斤童子小便浸透砂器中炒炒時不住手洒  
童便火勿過猛炒三晝夜爲度川木耳四兩紙包裹  
以新瓦兩片夾定繩縛泥固火煨存性覺烟起良久  
急去火取置冷地候冷取出同香附研極細如麩每

五七分淡醋湯調空心服此治血崩秘方累試有驗  
交感丹凡人中年精耗神衰蓋由心血少火不下  
降腎氣憊水不上升致心腎隔絕榮衛不和上則多  
驚中則塞痞飲食不下下則虛冷遺精愚醫徒知峻  
補下田非惟不能生水滋陰而反見衰悴但服此方  
半年屏去一切煖藥絕嗜欲然後習祕固泝流之術  
其效不可殫述香附子一斤新水浸一宿炒黃同茯  
神四兩爲末蜜丸彈子大每早細嚼一丸以降氣湯  
下降氣湯用香附半兩茯神二兩炙甘艸一兩半爲  
末點沸湯服前藥 和劑局方升降諸氣并一切氣  
病痞脹喘噓噫酸煩悶虛痛走注常服開胃消痰散

壅思食早行山行尤宜服之去邪辟瘴香附子炒四  
百兩沈香十八兩縮砂仁四十八兩炙甘艸一百二  
十兩爲末每服一錢鹽湯點服 又方香附一斤砂  
仁八兩炙甘艸四兩爲末鹽湯服治一切氣疾心腹  
脹滿噎塞噫氣吞酸痰逆嘔惡及宿酒不解 又方  
香附二十兩烏藥十兩甘艸炒一兩爲末鹽湯服二  
錢能調中快氣治心腹刺痛 集簡方香附二兩蘄  
艾五錢以醋湯同煮熟去艾炒爲末醋糊丸白湯服  
二錢治心氣痛腹痛少腹痛血氣痛不可忍 仁存  
方香附皂莢水浸半夏各一兩白礬末半兩薑汁麩  
糊丸薑湯下一二錢治停痰宿飲風氣上攻胸膈不

刊同南星等分爲末薑汁糊丸治老少疝癖往來  
疼痛 集簡方香附末二錢以海藻一錢煎酒空心  
調下并食海藻治癩疔脹痛及小腸氣 婦人良方  
香附炒一兩荔枝核燒存性半兩爲末每二錢米飲  
調下治血氣刺痛 瑞竹堂方四製香附丸香附一  
斤分作四分用酒醋鹽水童便各浸春三夏一秋五  
冬七日淘淨曬搗微焙爲末醋糊丸梧子大每酒下  
七十九丸治女人經候不調兼諸病瘦人加澤蘭赤茯  
苓末二兩氣虛加四君子料血虛加四物料 濟生  
方香附四兩茯苓甘艸炙各一兩橘紅二兩爲末沸  
湯下二錢治婦人氣盛血衰變生諸證頭暈腹滿皆



宜獨用炒為末極熱酒服二錢立愈下血血崩或五色漏帶竝宜常服滋血調氣乃婦人之仙藥也

同赤芍藥為末加鹽一捻煎服治赤白帶下及崩漏不止君縮砂仁炙甘艸能臨產順胎九月十月服

此永無驚恐獨用為末童叟調下二錢治氣鬱吐

血君川芎治氣鬱頭痛獨用為末萊菔子煎湯

早夜各服二錢治耳卒聾閉

簡誤

香附香燥苦溫帶辛凡月事先期者血熱也法當涼血禁用此藥誤犯則愈先期矣

胡黃連味苦平無毒主久痢成疳傷寒欬嗽溫瘧骨熱



理腰腎去陰汗小兒驚癇寒熱不下食霍亂下痢

唐本云大

寒主骨蒸勞熱補肝膽明目治冷熱洩痢益顏色厚腸胃治婦人胎蒸虛驚治三消五痔大人五心煩熱惡菊  
花玄參白鮮皮解巴豆毒服之忌猪肉令人漏精折之塵出如烟者真肉似鸚鵡眼者良

〔疏〕胡黃連得天地清肅陰寒之氣故其味至苦其氣

大寒性則無毒善除溼熱故主久痢成疳及冷熱洩

痢厚腸胃傷寒欬嗽者邪熱在手太陰足陽明也溫

瘧骨蒸者熱在骨間也理腰腎去陰汗者腎虛溼熱

下流客之使熱伏腎間也小兒驚癇寒熱不下食者

熱則生風故發驚癇熱在胃口故不下食也心主五

色脾胃主肌肉二經溼熱去則顏色自佳也三消五

痔大人五心煩熱者無非溼熱在腸胃及火在五臟

間也大寒至苦極清之性能清熱自腸胃以次於骨  
一切溼熱邪熱陰分伏熱所生諸病莫不消除

主治參互

蘇頌圖經治傷寒勞復身熱大小便赤如血色者胡  
黃連一兩山梔仁二兩入蜜半兩拌和炒令微焦二  
味搗羅爲末用豬膽汁和丸梧子大每服用生薑二  
片烏梅一枚童便三合浸半日去滓食後煖童便令  
溫下十丸臨臥再服甚效 全幼心鑑治小兒疳熱  
肚脹潮熱髮焦不可用大黃黃芩傷胃之藥恐生別  
證以胡黃連五錢五靈脂一兩爲末雄豬膽汁和丸  
菴豆大米飲服一二十九 錢乙小兒方訣治脾熱

疳疾用胡黃連川黃連各半兩硃砂二錢半爲末入  
豬膽內紮定以杖子鈞懸於砂鍋內漿水煮一炊久  
取出研爛入盧會麝香各一分飯和丸麻子大每服  
五七丸至一二十九丸米飲下 又方治小兒黃疸胡  
黃連川黃連各一兩爲末用黃瓜一箇去瓢留蓋入  
藥在內合定麪裹煨熟去麪搗丸棗豆大量大小溫  
水下

簡誤

胡黃連氣味苦寒之至設使陰血太虛真精耗竭而  
胃氣脾陰俱弱者雖見如上諸證亦勿輕投卽欲用  
之亦須健脾安胃等藥同用方可無弊慎之

鱧腸味甘酸平無毒主血痢鍼灸瘡發洪血不可止者  
傅之立已汁塗髮眉生速而繁

疏鱧腸正稟北方坎水之氣故其汁玄黑其味甘酸  
平而無毒純陰之艸也入腎入肝亦入胃與大小腸  
善涼血鬚髮白者血熱也齒不固者腎虛有熱也涼  
血益血則鬚髮變白而齒亦因之而固矣故古今變  
白之艸當以茲為勝本經主血痢及鍼灸瘡發洪血  
不可止者傅之立已塗眉髮生速而繁蕭炳又謂能  
止血排膿通小腸傅一切瘡膏點鼻中添腦者蓋以  
血痢由於血分為溼熱所傷鍼灸瘡發洪血不止亦  
緣病人素有血熱及加艾火則益熾矣血涼則不出



榮血熱壅則生膿涼血則自散小腸屬丙火有熱則不通榮血熱解則一切瘡自愈腦爲髓之海熱則消火能消物故也鼻竅通氣於腦故以膏點鼻中使腦中熱散無邪剝蝕則腦自益矣之數者何非涼血益血之功也

主治參互

孫真人千金月令方有金陵煎能益髭鬚變白爲黑金陵艸一秤六月後收揀青嫩無泥土者不用洗抹淨摘去黃葉爛搗新布絞取汁以紗絹濾過入通油器鉢盛之日中煎五日又取生薑一斤絞汁白蜜一斤合和日中煎以柳木勿停手攪待如稀餈藥乃成



矣每早及午後各服一匙以溫酒一盞化下如欲作  
丸日中再煎令可丸每服三十九丸及時多合爲佳

攝生眾妙用方取旱蓮艸根一斤用無灰酒洗淨青  
鹽四兩淹三宿同汁入油鍋中炒存性研末日用擦  
牙連津嚙之能烏鬚固齒又方旱蓮一兩半麻籬餅  
三兩升麻青鹽各三兩半訶子連核二十箇皂角三  
挺晚蠶沙二兩炒爲末薄醋麪糊丸彈子大曬乾入  
泥瓶中火煨令烟出存性取出研末日用揩牙又  
方取汁滴鼻中治偏正頭痛同藍葉各一握油一  
斤入浸密封四十九日每臥時以鐵匙點一切眼疾  
翳膜遮障涼腦再摩頂上四十九遍久久甚佳亦治

頭痛能生髮 同車前艸等分杵取汁每空心服三  
杯治小便溺血 獨用瓦上焙研每米飲下二錢治  
腸風臟毒下血不止 獨用搗汁衝極熱酒飲治痔  
漏瘡發外卽以滓傅患處重者不過三服 同鹽少  
許揉擦掌心治風牙疼痛

簡誤

鯉腸性冷陰寒之質雖善涼血不益脾胃病人雖有  
血熱一見脾胃虛敗飲食難消及易溏薄作泄者勿  
輕與服孫真人方用薑汁和劑蓋防其冷而不利於  
腸胃故也不用薑汁椒紅相兼修事服之者必腹痛  
作泄宜詳審之

使君子味甘溫無毒主小兒五疳小便白濁殺蟲療瀉痢俗傳始因潘州郭使君療小兒多是獨用此物後醫家因號爲使君子

疏使君子得土之冲氣而兼感乎季春之令以生故其味甘其氣溫其性無毒甘入脾故入足太陰陽明爲補脾健胃之要藥小兒五疳便濁瀉利及腹蟲莫不皆由脾虛胃弱因而乳食停滯溼熱瘀塞而成脾健胃開則乳飲自消溼熱自散水道自利而前證俱除矣不苦不辛而能殺疳蚘此所以爲小兒上藥也

主治參互

得盧會蕪荑滑石麥芽厚朴橘皮治一切疳疾神效

又方治小兒脾疳使君子盧會等分爲末米飲每  
服一錢 全幼心鑑治小兒蛔痛口流涎沫使君子  
爲末五更米飲調服一錢 簡便方治小兒虛腫頭  
面陰囊俱浮使君子肉一兩蜜五錢炙盡爲末每食  
後米湯服一錢 普濟方治頭瘡面瘡使君子仁以  
香油少許浸三五枚臨臥時細嚼香油送下久久自  
愈 集簡方治蟲牙疼痛使君子煎湯頻嗽

簡誤

小兒泄痢有赤積是暑氣所傷禁與肉豆蔻訶子等  
盪熱藥同用亦忌食熱物及飲熱茶犯之卽泄

白豆蔻味辛大溫無毒主積冷氣止吐逆反胃消穀下

氣入藥去皮微焙用

〔疏〕白豆蔻感秋燥之令而得乎地之火金故其味辛其氣大溫其性無毒好古大辛熱味薄氣厚輕清而升陽也浮也入手太陰亦入足陽明經味大辛也氣大溫也宜其主積冷氣及傷冷吐逆因寒反胃也煖能消物故又主消穀溫能通行故主下氣東垣用以散肺中滯氣寬膈進食去白睛翳膜散滯之功也

主治參互

得人參生薑橘皮藿香治胃虛反胃及因寒嘔吐殊驗 得半夏橘紅生薑白朮茯苓治寒痰停胃作嘔吐似反胃 得橘皮白朮白茯苓決明子甘菊花蜜



蒙花木賊艸穀精艸理脾虛白睛生障翳 得藿香

橘皮木香理上焦滯氣加烏藥香附紫蘇治婦人一

切氣逆不和 佐參朮薑橘治秋深瘧發寒多熱少

嘔吐胃弱飲食不進良 同菹豆五味子橘紅木瓜

能解酒毒及中酒嘔吐惡心 張文仲備急方治胃

冷惡心食已卽欲吐用白豆蔻三枚擣細好酒一盞

溫服併飲數服佳 別後方治人忽惡心多嚼白豆

蔻子最佳 危氏得效方治小兒吐乳胃寒者白豆

蔻縮砂蜜各十四箇生炙甘艸各二錢爲末常摻入

兒口中 濟生方治脾虛反胃白豆蔻縮砂蜜各二

兩丁香一兩陳廩米一升黃土炒焦去土細研薑汁

和丸每二三錢薑湯下名太倉丸

簡誤

白豆蔻辛溫其治在因寒嘔吐反胃其不因於寒及陽虛者皆不得入故凡火升作嘔因熱腹痛法咸忌之

剪艸涼無毒治惡瘡疥癬風瘙根名白藥

葉似茗而細

〔疏〕剪艸稟天地清寒至陰之氣以生故藏器云味苦其氣寒涼性應無毒主諸惡瘡疥癬風瘙癢蝕者以諸痛癢瘡瘍皆屬心火苦寒能降火而涼血清熱故主之也溼熱生蟲苦能殺蟲寒能除熱故有蟲浸酒服

主治參互

潔古專以主上部血而與牡丹皮天門冬麥門冬同  
用許學士本事方云剪艸治癆瘵吐血肺損及血  
妄行名神傳膏其法每用一斤洗淨曬爲末入生蜜  
二斤和爲膏以器盛之不得犯鐵器九蒸九曝日一  
蒸曝病人五更起面東坐不得語言以匙抄藥如粥  
服之每服四兩服已良久以稀粟米飲壓之藥只冷  
服米飲亦勿太熱或吐或下皆不妨如久病肺損咯  
血只二服愈尋常咳嗽血妄行每服一匙可也有一  
貴婦病瘵得此方九日藥成前一夕病者夢人戒令  
翌日勿亂服藥次日將服之爲屋上土墜器中不可

服再合既成又將服之爲婢覆器又不得服又再合未就而夫人卒矣此藥之異如此若小小血妄行一啜而愈矣此藥絕妙若此而世失傳惜哉中藏經治風蟲牙痛剪艸細辛藁本等分煎水熱漱少頃自止和劑局方有滑肌散治風邪客於肌中渾身瘙癢致生瘡疥及脾肺風毒攻衝生瘡乾溼日久不瘥用剪艸七兩不見火輕粉一錢爲末摻之乾者麻油調搽

簡誤

剪艸大苦大寒之藥雖治血熱妄行神效若脾腎俱虛胃口薄弱見食欲嘔及不思食泄瀉者勿遽投之

法當先理脾胃俟能進食而後施治乃可

豆蔻味辛溫無毒主溫中心腹痛嘔吐去口臭氣

開寶主下

氣止霍亂一切冷氣消酒毒東垣調中補胃健脾消食去客寒心與胃痛○白果部移入

〔疏〕豆蔻得地二之火氣而有金復兼感乎夏末秋初

之令以生故別錄謂其味辛氣溫而性無毒海藏又

云大辛熱陽也浮也入足太陰陽明經蓋辛能破滯

香能入脾溫熱能祛寒燥溼故主溫中及寒客中焦

心腹痛中寒嘔吐也脾開竅於口脾家有積滯則痰

而爲熱故發口臭醒脾導滯則口氣不臭矣辛散溫

行故下氣寒客中焦飲食不消氣因閉滯則霍亂又

散一切冷氣消酒毒者亦燥溼破滯行氣健脾開胃



之功也產閩之建寧者氣芳烈類白豆蔻善散冷氣  
療胃脘痛理中焦產滇貴南粵者氣猛而濁俗呼艸  
果者是也善破瘴癘消穀食及一切宿食停滯作脹  
悶及痛

主治參互

入人參養胃湯能消一切宿食開拓中焦滯氣 藥  
性論云艸豆蔻單用能主一切冷氣 千金方治心  
腹脹滿短氣用艸豆蔻一兩去皮爲末以木瓜生薑  
湯調服半錢 聖濟總錄治霍亂煩渴艸豆蔻黃連  
各一錢半烏豆五十粒生薑三片水煎服 濟生方  
治氣虛痺瘧熱少寒多或單寒不熱或虛熱不寒用

艸果仁熟附子等分水一盞薑七片棗一枚煎半盞  
服名果附湯醫方大成亦用治脾寒瘧大便泄而小  
便多不能食者 百一選方治脾腎不足虛寒泄瀉  
艸果仁一兩以舶上茴香一兩炒香去茴不用吳茱  
萸一兩湯泡七次同破故紙一兩炒香去故紙不用  
胡盧巴一兩同山茱萸一兩炒香去茱萸不用三味  
爲末酒糊丸每六七十丸鹽湯下 肘後方香口辟  
臭艸豆蔻細辛爲末含之 直指方治脾痛脹滿艸  
果仁二箇酒煎服之

簡誤

豆蔻性溫熱味大辛本是祛寒破滯消食除瘴之藥

凡瘧不由於瘴氣心痛胃腕痛由於火而不由於寒  
溼熱瘀滯暑氣外侵而成滯下赤白裏急後重及泄  
瀉暴注口渴溼熱侵脾因作脹滿或小水不利咸屬  
暑氣溼熱皆不當用犯之增劇

藿香微溫療風水毒腫去惡氣療霍亂心痛

自木部  
移入

〔疏〕藿香稟清和芬烈之氣故其味辛其氣微溫無毒  
潔古辛甘又曰甘苦氣厚味薄淨而升陽也東垣可  
升可降陽也入手足太陰亦入足陽明經風水毒腫  
病在於脾惡氣內侵亦由脾虛邪入霍亂心腹痛皆  
中焦不治之證脾主中焦香氣先入脾理脾開胃正  
氣通暢則前證自除矣蘇頌以爲脾胃吐逆爲要藥

潔古謂其助胃氣開胃口進飲食海藏謂其溫中快  
氣肺虛有寒及寒鬱熱壅於上焦飲酒口臭煎湯飲  
之皆辛溫入肺入脾清上治中之功也

主治參互

得縮砂蜜炒鹽治霍亂 得人參橘皮木瓜茯苓縮

砂蜜治吐瀉轉筋霍亂 得木香沈水香乳香縮砂

蜜則辟惡氣治中惡心腹疔痛 入順氣烏藥散則

補肺入黃耆四君子湯則補脾人桂苓甘露飲治中

暑吐瀉 得木香丁香紫蘇葉人參生薑治暴中寒

邪吐逆不止 經效濟世方升降諸氣藿香一兩香

附炒五兩爲末每以白湯點服一錢 百一選方治

霍亂吐瀉垂死者服之回生用藿香葉陳皮各半兩  
水煎溫服 禹師經驗方治暑月吐瀉滑石二兩藿  
香二錢五分丁香五分爲末每服二錢浙米泔調服  
簡誤

藿香雖能止嘔治吐逆若病因陰虛火旺胃弱欲嘔  
及胃熱作嘔中焦火盛熱極溫病熱病陽明胃家邪  
實作嘔作脹法竝禁用

假蘇味辛溫無毒主寒熱鼠瘦癩癧生瘡破結聚氣下  
瘀血除溼痺

自菜部  
移入

〔疏〕假蘇荆芥也得春氣善走散故其氣溫其味辛其  
性無毒升也陽也春氣升風性亦升故能上行頭目



肝主風木故能通肝氣行血分能入血分之風藥也  
故能發汗其主寒熱者寒熱必由邪盛而作散邪解  
肌出汗則寒熱自愈鼠瘦由熱結於足少陽陽明二  
經火熱鬱結而成瘰癧爲病亦屬二經故也生瘡者  
血熱有溼也涼血燥溼瘡自脫矣破結聚氣者辛溫  
解散之力也下瘀血入血分辛以散之溫以行之之  
功用也痺者風寒溼三邪之所致也祛風燥溼散寒  
則溼痺除矣

主治參互

得白頸蚯蚓同搗取汁解陽明經熱病汗出立已得  
童子小便調服立蘇血暈 千金方治頭項風強入

月後取荆芥穗作枕及鋪牀下立春日去之 又方  
 治風熱牙疼用荆芥根烏柏根葱根等分煎湯頻含  
 漱之 經驗方治一切偏風口眼喎斜用青荆芥一  
 斤青薄荷一斤同搗汁於磁器中熬成膏留三分之  
 一將二分日乾為末以膏和丸如梧子大每三十九  
 白湯下早暮各一服忌動風物 又方治中風口噤  
 荆芥穗為末酒服二錢立愈名荆芥散賈似道云此  
 方出曾公談錄前後用之甚驗其子名順者病已革  
 服之立定真再生丹也 華佗愈風散治婦人產後  
 中風口噤手足瘳癱如角弓或產後血暈不省人事  
 四肢強直或心眼倒築吐瀉欲死用荆芥穗微焙為

末每服三錢豆淋酒調服或童便服之口噤則挑齒  
灌之齟噤則灌入鼻中其效如神大抵產後虛甚則  
汗出而腠理疎易於中風也戴原禮獨行散治產  
後迷悶因怒發熱而得者用荆芥穗以新瓦半炒半  
生爲末童便服一二錢若角弓反張以豆淋酒下或  
剉散童便煎服極妙蓋荆芥乃產後要藥而角弓反  
張乃婦人急候得此證者十存一二而已圖經本  
艸治產後血暈築心眼倒風縮欲死者取荆芥末二  
錢七童便調勻熱服立愈口噤者灌鼻中皆效近世  
名醫用之無不如神也保命集治產後血眩暈風  
虛精神昏冒荆芥穗一兩三錢桃仁去皮尖五錢爲

末水服三錢若喘加杏仁去皮尖炒甘艸炙各三錢

婦人良方治產後鼻衄荆芥穗末童便服二錢海

上方也 簡便方治大便下血用荆芥二兩槐花一

兩同炒紫為末每三錢清茶送下 活法機要治瘰

癧潰爛牽至胸前兩腋塊如茄子大或牽至兩肩上

四五年不能療者皆治之其效如神晉陵朱守仁傳

云其項不能回顧用此數日減可如瘡爛破者用荆

芥根下一段剪碎煎沸待溫洗良久看爛破處紫黑

以鍼一刺去血再洗三四次愈用樟腦雄黃等分為

末麻油調掃上出水次日再洗再掃以愈為度 普

濟方治一切疥瘡荆芥末以地黃自然汁熬膏和丸

如梧子大每服三十五丸茶酒任下龍木論治一

切眼疾血勞風氣頭痛頭眩目眩用荆芥穗末每酒

服三錢普濟方治癰閉不通小便急痛無問久新

荆芥大黃爲末等分每溫水服三錢小便不通大黃

減半大便不通荆芥減半名倒換散平陽縣志

具簡誤

荆芥風藥之辛溫者也主升主散不能降亦不能收

病人表虛有汗者忌之血虛寒熱而不因於風溼風

寒者勿用陰虛火炎面赤因而頭痛者慎勿誤入

蘇味辛溫主下氣除寒中其子尤良

忌與鯉魚同食生毒瘡自菜部移入

疏蘇紫蘇也得天陽和之氣故溫兼地之金味故辛



辛則善散溫能通氣故主下氣除寒中也子尤良者以其善降氣也入手少陰太陰足陽明經孟詵謂其除寒熱治一切冷氣日華子謂其補中益氣治心腹脹滿止霍亂轉筋開胃下食止腳氣通大小腸蘇頌謂其通心經益脾胃煮飲尤勝與橘皮相宜時珍謂其解肌發表散風寒行氣寬中消痰利肺和血溫中止痛定喘安胎解魚蟹毒 子味辛溫無毒主下氣除寒溫中甄權用以治上氣咳逆冷氣及腰腳中溼氣風結氣研汁煮粥常食令人肥白身香日華子謂其能止霍亂嘔吐反胃消五膈消痰止嗽潤心肺寇宗奭用以治肺氣喘急皆辛溫能散結而兼潤下

之力也

主治參互

蘇陽艸也解肌散寒疏表辟惡之要藥 入參蘇飲  
治表虛人傷風久不愈 入蘇沈九寶湯解利傷風  
寒咳嗽 肘後方治感寒上氣蘇葉三兩橘皮四兩  
酒四升煮一升半分再服 又方治霍亂脹滿未得  
吐下生蘇擣汁飲之佳乾蘇煮飲亦妙 金匱要略  
療食蟹中毒紫蘇煮汁飲二升 普濟方治欬逆上  
氣蘇莖葉二錢人參一錢水一鍾煎數沸服 濟生  
方順氣利腸紫蘇子麻仁等分研爛水瀝取汁同米  
煮粥食之 聖惠方治風順氣利腸寬中用蘇子一

升微炒杵以生絹袋盛於三斗清酒中浸三宿少炒食之 藥性論治一切冷氣蘇子良薑橘皮等分蜜丸梧子大每服十九空心酒下又用治風溼腳氣 簡便方治上氣欬逆紫蘇子入水研濾汁同粳米煮粥食

簡誤

蘇葉其氣芬芳其味辛其性溫純陽之艸也故善發散解肌出汗病屬陰虛因發寒熱或惡寒及頭痛者慎毋投之以病宜斂宜補故也火升作嘔者亦不宜服惟可用子

香薷味辛微溫主霍亂腹痛吐下散水腫

菜部移入

疏香薷丹溪謂其有金與水然亦感夏秋之氣以生者故其味辛其氣微溫而無毒可升可降陽也入足陽明太陰手少陰經辛散溫通故能解寒鬱之暑氣霍亂腹痛吐下轉筋多由暑月過食生冷外邪與內傷相并而作辛溫通氣則能和中解表故主之也散水腫者除溼利水之功也孟詵謂其去熱風卒轉筋者煮汁頓服半升卽止爲末水調服止鼻衄日華子謂其下氣除煩熱療嘔逆冷氣汪穎謂其夏月煮飲代茶可無熱病調中溫胃含汁嗽口去臭氣

主治參互

香薷飲有十味者有六味者有加黃連者雖同爲祛

暑之藥然脾胃腎俱虛之人當以十味者爲準除有肺熱咳嗽病者去人參白朮黃耆 治水腫以之爲

君當同人參朮木瓜茯苓橘皮白芍藥車前子良

和劑局方香薷飲治一切傷暑或暑月臥溼當風或生冷不節真邪相干便致吐利或發熱頭痛體痛或心腹痛或轉筋或乾嘔或四肢逆冷或煩悶欲死竝用香薷一斤厚朴薑製菡豆微炒各半斤剉散每用五錢水二盞煎一盞水中沈冷連進二服立效活人書去菡豆入黃連四兩薑汁同炒黃色 外臺秘要治水病洪腫氣脹食不消乾香薷五十斤剉入釜中以水淹過三寸煮使氣盡去滓澄之微火煎至可丸



丸如梧子大一服五丸日三服漸加之以小便利則  
愈宜有朮同煎 外臺秘要薺朮丸治暴水風水氣  
水通身皆腫服至小便利爲效用香薺葉一斤熬成  
膏加白朮末七兩和丸梧子大每服十九丸米飲下日  
五夜一服 肘後方治心煩脇痛連胸欲死者香薺  
搗汁二升服 聖濟總錄治鼻衄不止香薺研末水  
服一二錢 肘後方治舌上出血如鑽孔者香薺煎  
汁服一升日三進 千金方治口臭香薺一把煎汁  
含之 食醫心鏡主心煩去熱取煎湯作羹煮粥及  
生食亦得 子母秘錄治小兒白禿髮不生汁出慘  
痛濃煮陳香薺汁入猪脂少許和胡粉傅之 衍義

本草綱目 卷九  
云治霍亂不可缺用之無不效 雷公云凡採得去  
根留葉細剉曝乾勿令犯火服至十兩一生不得食  
白山桃也

簡誤

香薷性溫不宜熱飲故治乘涼飲冷寒與暑氣相搏  
激是陽氣爲陰邪所遏以致頭疼發熱惡寒煩躁口  
渴或吐或瀉或霍亂者宜用此藥以發越陽氣散水  
和脾則愈若夫飲食不節勞役斲喪之人傷暑熱而  
病大熱大渴汗泄如雨煩躁喘促或瀉或吐者乃勞  
倦內傷之證宜從東垣人參白虎湯清暑益氣湯桂  
苓甘露飲之類以瀉火益元可也然中熱不吐瀉者

宜人參白虎湯吐瀉者宜清暑益氣湯桂苓甘露飲  
設用香薷是重虛其表而又濟之以溫則誤矣蓋香  
薷乃夏月解表之藥表無所感而中熱爲病何假於  
此哉誤則損人表氣戒之戒之

薄荷味辛苦溫無毒主賊風傷寒發汗惡氣心腹脹滿  
霍亂宿食不消下氣煮汁服亦堪生食飲汁發汗大解

勞煩

菜部  
移入

〔疏〕薄荷感杪春初夏之氣而得乎火金之味金勝火  
劣故辛多於苦而無毒潔古辛涼浮而升陽也入手  
太陰少陰經辛合肺肺主皮毛苦合心而從火化主  
血脈主熱皆陽臟也賊風傷寒其邪在表故發汗則

解風藥性升又兼辛溫故能散邪辟惡辛香通竅故  
治腹脹滿霍亂食療以爲能去心家熱故爲小兒驚  
風風熱家引經要藥辛香走散以通關節故逐賊風  
發汗者風從汗解也本非脾胃家藥安能主宿食不  
消上升之性亦難主下氣勞乏屬虛非散可解三療  
俱非明者當自別之

主治參互

風熱上壅斯爲要藥 入噲化丸以之爲君主陰虛  
肺熱咳嗽甚良加生乾薑并治傷風寒咳嗽 佐漆  
葉苦參何首烏胡麻仁荆芥穗生地黃蒺藜子石菖  
蒲蒼朮治大麻風去蒼朮加赤莖豨薟治紫雲風



同貝母荆芥穗玄參斑猫佐肥皂能治瘰癧 外臺  
秘要治水入耳中擣汁滴入立驗 孫真人用以辟  
邪毒除勞氣令人口气香潔煎湯洗漆瘡 日華子  
用以治中風失音吐痰 蘇頌主傷風頭腦風通關  
節及小兒風涎爲要藥 東垣用以清頭目除風熱  
故可療風瘙癢癭及塗蜂螫 簡便單方清上化痰  
利咽膈治風熱上壅以薄荷葉爲末煉蜜丸芡實大  
每噙一丸 醫學集成治舌胎語蹇薄荷自然汁和  
白蜜薑汁少許擦之 明目經驗方治眼弦赤爛薄  
荷以生薑汁浸一宿曬乾爲末每用一錢沸湯泡洗  
濟生方治瘰癧結核或破未破以新薄荷二斤取



本州經正  
卷九  
汁皂莢一挺水浸去皮搗取汁同於銀石器內熬膏  
入連翹末半兩連白青皮陳皮黑牽牛半生半炒各  
一兩皂莢仁一兩半同搗和丸梧子大每服三十八  
煎連翹湯下 張杲醫說療火毒熱瘡因灸火火氣  
入內兩股生瘡汁水淋漓者用薄荷煎汁頻塗立愈

簡誤

病人新瘥勿服以其發汗虛表氣也咳嗽若因肺虛  
寒客之而無熱證者勿服以其當補而愈也陰虛人  
發熱勿服以出汗則愈竭其津液也腳氣類傷寒勿  
服以其病在下而屬脾故也血虛頭痛非同諸補血  
藥不可用小兒身熱由於傷食者不可用小兒身熱

因於疖積者不可用小兒痘瘡診得氣虛者雖身熱  
初起亦不可用

卷之二

四

卷之二

周氏校刊

皖南建德  
周氏校刊